



President vun der Chamber

Lëtzebuerg, den 19. September 2024

Här President,

Esou wéi d'Chambersreglement et virgesäit, bieden ech lech, dës parlamentaresch Fro iwwert **d'Tablet-Computeren an de Lycéeën** un den **Här Minister fir Educatioun, Kanner a Jugend** weiderzeleeden.

Am Kader vun der Strategie "one2one" verfollegt den Educatiounsministère d'Zil, fir d'Afëiere vu mobile Geräter wéi Tablet-Computeren am Secondaire ze verallgemengere fir dës als pedagogesch Outil kënnen ze benotzen. Fir dëse Projet ze begleeden huet de Centre de Gestion informatique de l'éducation (CGIE) en Akafprogramm iwwert eng Rei Jore lancéiert. D'Bereetstelle vun de Geräter un d'Kanner a Jugendlech baséiert op engem Locatiounsmodell mat enger finanzieller Bedeelegung vun den Elteren an Héicht vu 50 Euro pro Schouljoer.

Eisen Informatiounen no hunn zur Rentrée a verschidde Lycéeën nach net all déi nei Schüler\*innen en entspreechend Gerät kënnen zur Verfügung gestallt kréien, an dat obwuel si an enger sougenannter "Tablet-Klass" sinn. Eltere vun de concernéierte Schüler\*innen kruten op Nofro hi gesot, dës Geräter solle viraussichtlech am November ukommen an et hätt budgetär Grënn, dass si aktuell nach géife feelen.

Doriwwer eraus goufen et eisen Informatiounen no och Changementer bei der finanzieller Prise en charge, wann Tablet-Computere verluer oder zerstéiert ginn. Während an der Vergaangenheet d'Elteren hei eng pauschal Franchise vun 100€ a Rechnung gestallt kruten, missten si elo de Reschtwäert rembourséieren, deen sech op e Villfacht vun dem Montant ka belafen. Och hei kruten Elteren op Nofro hi gesot, dëse Changement wier op budgetär Grënn zeréckzeféieren.

An dësem Kontext erlaben ech mer folgend Froen un den Här Minister ze stellen :

- 1. Stëmmt et, dass verschidde Schoulen aktuell nach net genuch Tablet-Computeren fir déi nei Schüler\*innen zur Verfügung hunn? Wa jo, kann de Minister eis opschlësselen, wéi eng Schoulen dëst sinn, a wéivill Geräter hinne jeeweils feelen?**
- 2. Bis wéini rechent de Minister domat, dass all d'Schoule genuch Tablets hunn?**
- 3. Falls et wierklech budgetär Constraintë beim Akaf vun Tablet-Computere gëtt: anticipéiert de Ministère, dass dës sech iwwert den Zäitraum vum pluriannuelle Budget wäerte widderhuelen? Wa jo, gëtt et schonns lwwerleungen, fir dës Probleemer entgéint ze wierken?**
- 4. Kann de Minister déi uewe genannten Ännerunge bei der Prise en charge vu verluerenen oder futtissen Tablet-Computere confirméieren? Wa jo, ass dëse Changement effektiv op budgetär lwwerleungen zeréck ze féieren?**

5. Kann de Minister eis d'Formel bzw. den Tableau fir d'Determinatioun vum Reschtwäert kommunizéieren?
6. Falls en Tablet-Computer duerch en Accident futti geet oder verluer gëtt, kënnen Elteren de Reschtwäert op hir Versécherung huelen?
7. Wat geschitt, wann Elteren dës Zomm net kënnen oder wëlle bezuelen, wëssend dass den Tablet-Computer en essentiellen Deel vum pedagogesche Konzept an de betraffene Klassen ass an d'Schüler\*innen dowéinst ouni Tablet eng seriö Benodeelegung kéinten erfueren?

Mat déiwem Respekt,



**Djuna BERNARD**

Deputéiert



**Äntwert vum Minister fir Educatioun, Kanner a Jugend, Claude Meisch, op d'parlamentaresch Fro Nr. 1211 vun der honorabeler Deputéiert Djuna Bernard**

Ech verweise fir een Deel vun de Froe vun der honorabeler Deputéiert op meng rezent Äntwerten op d'parlamentaresch Fro Nr. 971. Fir d'Schouljoer 2024/2025 stinn 8.500 nei iPads zur Verfügung, déi aktuell an déi eenzel Lycéeë verdeelt ginn. Opgrond vu Liwwerengpäss bei verschiddenen Accessoirë fir d'iPads (Tastatur a Pencil) wäert dës Distributiounsphas bis Mëtt November goen. An enger Reunioun den 10. Oktober 2024 kruten d'Direktiounen vun de jeeweilege Lycéeën Informatiounen iwwer d'Disponibilitéit vun den iPads a si kruten och nach eemol verséichert, datt all Schoul déi néideg Geräter kréie wäert. Fir d'nächst Rentrée wäert et zu enger Adaptatioun vum *one2one*-Programm kommen. Aus didakteschen a pedagogesche Grënn wäert et haaptsächlech op den ënneschte Klassen am Secondaire zu Ännerunge kommen. Dëst Konzept gëtt aktuell ausgeschafft a wäert mat de Lycéeën diskutéiert ginn.

Et goufe rezent keng Ännerungen um Kontrakt am *one2one*-Programm gemaach. Am Fall vu Schied, Verloscht oder Déifstall vun iPads muss de Besëtzer vum iPad fir d'Valeur résiduelle vum Gerät opkommen. D'Valeur résiduelle ass an der Annex vum Kontrakt festgeluecht a geet vu 450 Euro am éischte Joer vum Gebrauch vum Gerät bis zu 70 Euro am fënnefte Joer. Ob Versécherunge vun den Eltere fir sou Fäll opkommen, hänkt vun dëse jeeweilege Kontrakter of a kann ech net beäntweren.

Falls Schüler Problemer hunn, fir d'Käschte fir de *one2one*-Programm ze bezuelen, kann ee beim SePAS/CePAS iwwer verschidde Programmer finanziell Ënnerstëtzung kréien.

Lëtzebuerg, den 22. Oktober 2024

De Minister fir Educatioun,  
Kanner a Jugend

(s.) Claude MEISCH